

ODLUKA JE USVOJENA NA VIJEĆU OPĆINE ZENICA DANA 07.07.2011. GODINE I STUPIĆE NA SNAGU 8 DANA NAKON OBJAVLJIVANJA U SLUŽBENIM NOVINAMA OPĆINE ZENICA.

BOSNA I HERCEGOVINA
FEDERACIJA BiH
ZENIČKO-DOBOJSKI KANTON
OPĆINA ZENICA

PREDLAGAČI:

Služba za komunalne poslove i ekologiju i
JP „Vodovod i kanalizacija“ d.o.o. Zenica

P R I J E D L O G

ODLUKA O VODOVODU I KANALIZACIJI

Zenica, juli 2011.godine

Na osnovu člana 8. i 14. Zakona o komunalnim djelatnostima ZE-DO kantona, člana 32. Statuta općine Zenica («Službene novine općine Zenica», broj:4/08), Vijeće općine Zenica, na sjednici održanoj dana _____ 2011. godine donosi

Odluku o vodovodu i kanalizaciji

I OPĆE ODREDBE

Član 1.

Snabdijevanje vodom za piće, te odvođenje i tretman fekalnih voda su djelatnosti od javnog interesa za općinu Zenica.

Ovom Odlukom propisuju se uslovi za snabdijevanje potrošača vodom za piće, odvođenja fekalnih voda i uređuje način eksploatacije održavanja i korišćenja vodovoda i kanalizacije na području grada Zenice, te prava i obaveze JP“ViK“d.o.o.Zenica, kao davaoca usluga, i potrošača, kao korisnika usluga u oblasti snabdijevanja vodom za piće, te prikupljanja, odvođenja i prečišćavanja fekalnih voda.

Obaveze i prava davaoca usluga i korisnika usluga propisane ovom odlukom imaju za cilj obezbjeđenje uslova za korektan međusoban odnos, za trajno obezbjeđenje efikasne, efektne i jeftine usluge isporuke vode za piće i odvođenje otpadnih voda.

Nepridržavanje odredaba ove Odluke može ugroziti efikasnost u pružanju naprijed navedenih usluga, pa se stoga provođenje u cijelosti odredbi ove Odluke imaju tretirati kao obaveze koje se provode i izvršavaju u javnom interesu.

Član 2.

Pod javnim vodovodnim uređajima i javnim vodovodnim sistemom smatraju se objekti za zahvatanje i prečišćavanje vode, crpna postrojenja, rezervoari, vodovodna mreža sa priključcima i vodomjerima zaključno sa glavnim vodomjernim oknom, odnosno uključujući i glavno vodomjerno okno, koji služi za snabdijevanje potrošača vodom iz vodovoda na području grada Zenice.

Skraćeni naziv javnih vodovodnih uređaja, odnosno javnog vodovodnog sistema je javni vodovod ili gradski vodovod.

Pod javnim kanalizacionim uređajima i javnim kanalizacionim sistemom smatraju se sistemi za prikupljanje i odvođenje fekalnih voda bilo separatnom ili mješovitom kanalizacijom čiji objekti i postrojenja čine jedinstvene konstruktivne i funkcionalne cijeline, zaključno sa priključnim oknima na glavnim kanalizacionim vodovima gdje se vrši uvođenje otpadnih voda iz kućnih instalacija.

Skraćeni naziv javnih kanalizacionih uređaja, odnosno javnog kanalizacionog sistema je javna kanalizacija ili gradska kanalizacija.

Kućnim, odnosno unutrašnjim, odnosno internim vodovodnim i kanalizacionim uređajima i instalacijama smatraju se sve vodovodne instalacije od glavnog vodomjera za dotični objekat; u zemlji, u podrumu, u zidovima, u podu, hidranti, hidrofleksi, sanitarni uređaji u zajedničkim prostorijama, i drugi dijelovi koji služe zajedničkoj svrsi, vodovodna instalacija u stanovima i poslovnim prostorima pojedinačni – interni vodomjeri stanova ili poslovnih prostora, elektro instalacija daljinskog očitavanja pojedinačnih- internih vodomjera sa završnom radio ili M-BUS centralom, kao i sva odvodna kanalizaciona instalacija iz stanova, poslovnih prostora i drugih dijelova dotičnog građevinskog objekta sve do posljednjeg sabirnog kanalizacionog okna unutar ili izvan objekta iz koga se kućna odnosno interna kanalizacija uvodi u gradsku kanalizacionu mrežu.

Posljednje sabirno kanalizaciono okno je okno u koje su uključene jedna ili više kanalizacionih instalacija iz objekta, a iz kojeg se direktno kućna kanalizaciona instalacija dalje priključuje na gradsku kanalizacionu mrežu.

Kućne instalacije iz stava tri ovog člana, kao i posljednje sabirno kanalizaciono okno iz prethodnog stava održavaju korisnici usluga.

Kućne odnosno interne instalacije moraju biti tako izvedene da je isključena svaka mogućnost zagađenja vode u javnom vodovodu.

Pod potrošačima odnosno korisnicima usluga snabdijevanja vodom za piće i odvođenje fekalnih voda podrazumjevaju se pravna i fizička lica, vlasnici objekata u kojim se koristi voda iz javnog vodovoda ili iz kojih se ispušta voda u javne kanalizacione instalacije za odvođenje otpadnih voda (u daljem tekstu potrošač).

Pod otpadnim vodama smatraju se:

a) fekalne vode:

- sanitarne i otpadne vode domaćinstva, ugostiteljskih objekata, bolnica i sl.
- drenažne vode groblja, sanitarnih deponija i sl.
- industrijske otpadne vode zagađene upotrebom u tehnološkom procesu ili pranju površina na kojima se odvija tehnološki proces.

b) atmosferske vode:

- oborinske vode,
- površinske vode,
- podzemne vode,
- višak vode mješovitog sistema izdvojen preko kišnih preljeva,
- vode upotrebene za pranje javnih površina,
- vode koje nisu nastale kao posljedica tehnološkog procesa (rashladne vode od 40° C, vode iz bazena za plivanje, prelivi i izlivi rezervoara čiste vode i sl.).

Otpadne vode se u pravilu prikupljaju i odvođe separatnim (razdjelnim) sistemom kanalizacije, tj. posebno fekalne a posebno atmosferske vode. Kanalizacija koja će se izvoditi nakon donošenja ove Odluke (nova kanalizacija) za sve objekte mora biti izvedena separatno, pri čemu ne smije doći do miješanja atmosferskih sa fekalnim vodama.

Fekalne vode se odvođe do sistema za prečišćavanje i nakon tog ispuštaju u recepijent, u vodotok. Atmosferske vode se odvođe posebnim sistemom do najbližeg otvorenog ili zasvođenog vodotoka.

Prije ispuštanja u vodotok za oborinske vode saobraćajnica izgrađuje se separator masnoće („mastolov“).

U izuzetnim slučajevima na prostorima gdje je već izgrađen mješoviti sistem kanalizacije, a izgradnja separatnog sistema za atmosferske vode zbog velike razdaljine do vodotoka, bi bila neekonomična. Javno preduzeće «Vodovod i kanalizacija» d.o.o. Zenica može odobriti nova uvođenja atmosferskih voda u fekalnu kanalizaciju.

Član 3.

Vodovodne i kanalizacione uređaje iz stava 1. i 2. člana 2. ove Odluke eksploatiše i održava, kao svoje stalno sredstvo Javno preduzeće «Vodovod i kanalizacija» d.o.o. Zenica (u daljem tekstu JP «ViK» d.o.o. Zenica).

Kućnim vodovodnim i kanizacionim uređajima i instalacijama smatraju se svi ostali vodovodni i kanizacioni uređaji kod potrošača iza glavnog vodomjera odnosno sabirnog okna koji služe za snabdijevanje vodom potrošača iz vodovoda i odvođenje fekalnih voda od korisnika. Za održavanje i njihovu ispravnost odgovaraju vlasnici objekta, odnosno potrošači.

Potrošač ima obavezu čuvanja vodomjera i ako se vodomjer nalazi u podrumu, garaži, odnosno u objektu potrošača.

Održavanje glavnog vodomjernog okna koje se nalazi na javnoj površini vrši JP «ViK» d.o.o. Zenica.

Pod preventivnim održavanjem vodomjernog okna podrazumjevaju se radnje i postupci koji spriječavaju zloupotrebu vodomjera i armature oko vodomjera; pobliže, podrazumjeva se čuvanje vodomjera od nasilnog i namjernog otuđenja i oštećenja, očuvanje plombi na vodomjeru i obezbjeđenje od smrzavanja u zimskom periodu.

Pod tekućim i investicionim održavanjem vodomjernog okna podrazumjevaju se sanacija betonskih zidova, zamjena betonskih zidova zbog dotrajalosti, blagovremeno baždarenje vodomjera i zamjena vodomjera zbog nenasilnih i nenemjernih kvarova i dotrajalosti.

Član 4.

Za ispravnost kvaliteta vode odgovorno je JP «ViK» d.o.o. Zenica, a u skladu sa Pravilnikom o zdravstvenoj ispravnosti vode za piće („Službeni Glasnik BiH“, broj:40/10).

Član 5.

U cilju omogućavanja trajnog, neprekidnog, neometanog i jeftinog snabdijevanja potrošača dovoljnim količinama vode i nesmetanog odvoda otpadnih voda JP «ViK» d.o.o. Zenica je dužno da:

1. Neprekidno održava u ispravnom stanju vodovodne i kanizacione uređaje iz stava 1. i 2. člana 2. ove Odluke i da ih proširuje.
2. Izvodi radove na vodovodnim i kanizacionim uređajima.
3. Kontrolira i poduzima sve potrebne mjere higijenske ispravnosti vode u vodovodu.
4. Da preduzima i sve zakonom dozvoljene mjere za blagovremenu naplatu naknade za pruženu uslugu od svih korisnika-potrošača.
5. Da vrši sve druge poslove iz nadležnosti propisanih ovom odlukom, te internim aktima preduzeća.

Član 6.

Ako do prekida snabdijevanja vodom dođe usljed više sile (elementarnih nepogoda i dr.), većih tehničkih smetnji u mreži, prekida snabdijevanja pogonskom energijom ili iz bilo kojih drugih razloga JP «ViK» d.o.o. Zenica je dužno odmah preduzeti sve potrebne mjere u cilju što bržeg otklanjanja nastalih smetnji. O nastalim smetnjama JP «ViK» d.o.o. Zenica je dužan odmah obavjestiti Načelnika općine Zenica i potrošače, putem raspoloživih medija (radio Zenica, TV Zenica itd.).

Kada je prekid snabdijevanja predvidiv (rekonstrukcija, veće opravke i dr.) JP «ViK» d.o.o. Zenica je dužno najmanje 24^h prije prekida na pogodan način obavjestiti potrošače.

Član 7.

Kako javni, tako i kućni odnosno interni vodomjeri, kućni vodovodni i kanizacioni uređaji i instalacije moraju biti izvedeni po važećim tehničkim propisima, standardima i normativima.

Od dana stupanja na snagu ove Odluke, pa ubuduće, vodomjerno okno sa glavnim vodomjerom za objekat mora biti, odnosno može se izgrađivati isključivo na javnoj površini.

Izuzetak od prethodnog stava, JP «ViK» d.o.o. Zenica može odobriti samo u slučajevima da to odgovara i potrošaču i JP «ViK» d.o.o. Zenica, ako bi u suprotnom izvedba prema stavu 2. izazvala enormno visoke troškove jednoj i drugoj strani.

Objektom se, u smislu navedenog u 2. stavu ovog člana smatra cjelina prostora jednog vlasnika koji će se prijaviti i dužiti kao jedan potrošač sa jednom jedinstvenom tarifom.

Stambeni objekat kolektivnog stanovanja sa 2 ili više vlasnika stambenih jedinica mora imati glavni vodomjer u vodomjernom oknu na javnoj površini.

Stambeno-poslovni objekti obavezni su imati zasebno glavni vodomjer za svaku tarifu tj. zasebno za stambeni dio, zasebno za poslovni dio i dio koji će eventualno koristiti ustanove.

Svi objekti koji budu građeni poslije stupanja na snagu ove Odluke moraju izvesti vodovodne instalacije i ugradnju vodomjera za svaki stan i poslovni prostor tako da se omogućava mjerenje potrošnje svakom vlasniku prostora (stambenog i/ili poslovnog) preko njegovog zasebnog vodomjera i očitavanje sa stubišta, te preko glavnog vodomjera za svaku tarifu u vodomjernom oknu. U jednom vodomjernom oknu može biti više vodomjera.

Saglasnost za priključak na vodovodnu i kanalizacionu mrežu JP «ViK» d.o.o. Zenica davat će na osnovu Izvedbenog projekta, a priključak će izvesti samo ako su ispunjeni uslovi utvrđeni ovom Odlukom.

Član 8.

Za izvođenje svih vrsta radova na javnim vodovodnim i javnim kanalizacionim uređajima iz stava 1. i 2. člana 2. Odluke isključivo pravo i ovlaštenje ima JP «ViK» d.o.o. Zenica.

Određivanje mjesta za priključenje objekata potrošača na javni vodovod i javnu kanalizaciju, te mjesta i tipa okna, vrste vodomjera i izvođenje priključaka i svih radova zaključno sa vodomjernim oknom i glavnim vodomjerom isključivo pravo i nadležnost ima JP «ViK» d.o.o. Zenica.

Izuzetno JP «ViK» d.o.o. Zenica može odobriti vlasniku odnosno korisniku da u vlastitoj režiji izvede građevinski dio potrebnih radova, s tim da kontrolu i prijem radova, te montažu i priključak izvrši JP «ViK» d.o.o. Zenica.

Sve troškove izvođenja priključaka snosi potrošač.

Član 9.

Potrošači i JP «ViK» d.o.o. Zenica su dužni pridržavati se odredaba ove Odluke te u cilju sprječavanja rasipanja i nekontrolisane potrošnje vode obavezni su održavati u ispravnom stanju svako svoje vodovodne i kanalizacione uređaje i instalacije tj. JP «ViK» d.o.o. Zenica instalacije iz člana 2. stav 1 i 2. do glavnog vodomjera i vodomjer, a potrošači instalacije iz člana 2. stav 3. iza glavnog vodomjera.

Glavni vodomjer predstavlja granicu između javnog vodovoda i kućnih vodovodnih instalacija.

Član 10.

Zabranjeno je korištenje vodovodnih instalacija i uređaja kao uzemljenja za električna postrojenja i naprave.

II MJESNI VODOVODI

Član 11.

Pod terminom mjesni vodovodi koje tretira ova odluka podrazumjevaju se vodozahvati, bunari, kaptaže s odgovarajućom opremom, postrojenja za prečišćavanje vode za piće, rezervoari i cjevovodi i drugi pripadajući objekti, koji služe za snabdijevanje vodom za piće naselja izvan općinskih sjedišta.

Član 12.

Vode iz mjesnih vodovoda ne smiju se miješati sa vodom iz javnog vodovoda kojim upravlja JP «ViK» d.o.o Zenica.

Instalacije javnog (gradskog) vodovoda i kućne instalacije korisnika, potrošača niti bilo koje iscrno mjesto na koje dolazi voda iz javnog vodovoda ne smiju biti spojene sa instalacijama na koje dolazi voda iz mjesnog vodovoda.

Član 13.

Ukoliko se gradska mreža proširi na seosko područje koje se snabdijevalo iz mjesnog vodovoda uslove i mogućnost korištenja gradskog vodovoda i izdavanje saglasnosti za priključak odredit će JP «ViK» d.o.o. Zenica. JP«ViK» d.o.o. Zenica pružanje usluge snabdijevanja iz javnog gradskog vodovoda dotičnim naseljima, odnosno potrošačima može usloviti preuzimanjem na upravljanje i korištenje mjesnih vodovoda dotičnog naselja, odnosno dotičnih potrošača.

Pod ingerencije ove Odluke potpast će i svi mjesni vodovodi onog trenutka kada i ako se na dotično područje proširi javna odnosno gradska vodovodna mreža.

Član 14.

Korisnicima mjesnih vodovoda neće se izvršiti priključak na gradski vodovod i kanalizaciju prije nego kućnu vodovodnu instalaciju za dotične objekte potpuno odvoje od kućnih instalacija spojenih na mjesni vodovod.

Ako potrošač nakon priključenja na javni gradski vodovod na istu kućnu instalaciju spoji mjesni vodovod, tada je JP«ViK» d.o.o. Zenica ovlašten i obavezan da objekat/te dotičnog potrošača isključi sa javnog vodovoda na način da mu se onemogući ponovno priključenje.

Na područjima gdje ne postoji mogućnost snabdijevanja vodom sa gradskog vodovoda a postoji mogućnost priključka otpadnih voda sa posebnog vodovoda na gradsku kanalizaciju JP «ViK» d.o.o. Zenica je ovlašten da izvrši priključenje objekata takvih područja na javnu gradsku kanalizaciju.

U slučajevima iz prethodnog stava visinu naknade za kanalizaciju JP «ViK» d.o.o Zenica će odrediti u skladu sa ovom odlukom, i to na osnovu statističkih pokazatelja srazmjerno potrošnji vode po članu domaćinstva i eventualnom korištenju vode za druge potrebe (tehnološko ispiranje, itd.).

III PRIKLJUČENJE OBJEKATA NA VODOVODNU I KANALIZACIONU MREŽU

Član 15.

Svi građevinski objekti na području grada Zenice koji sadrže kućne vodovodne i/ili kanalizacione instalacije sagrađeni u neposrednoj blizini javne vodovodne i kanalizacione mreže moraju se prije puštanja u upotrebu spojiti sa javnom vodovodnom odnosno kanalizacionom mrežom.

Termin „neposredna blizina“ u ovoj odluci podrazumijeva udaljenost 150 do 300 m, što zavisi od konfiguracije terena i objekata.

U slučajevima gdje je kanalizacioni kolektor javne gradske kanalizacije iznad objekta (na većoj nadmorskoj visini) pa fekalne vode iz objekta se ne mogu gravitaciono prevesti u kolektor, vlasnik objekta je obavezan priključiti se na javnu gradsku kanalizaciju prepumpavanjem. Obaveza priključenja prepumpavanjem podrazumijeva slučajeve gdje je visina prepumpavanja $H_p \leq 10$ m i dužina tlačnog voda do 150 m.

Objekti, koji nisu priključeni na već postojeću vodovodnu i kanalizacionu mrežu, moraju se priključiti na istu. Troškovi priključka padaju na teret vlasnika objekta.

Član 16.

JP «ViK» d.o.o. Zenica, uz naplatu naknade za isto, dužno je podnosiocu zahtjeva dati: uslove i tehničke podatke potrebne za izradu projektne dokumentacije kućnih instalacija vodovoda i kanalizacije, i saglasnost za priključenje objekta na gradski vodovod i kanalizaciju ukoliko je projektna dokumentacija urađena na osnovu datih uslova i tehničkih podataka i ako postoje tehničke mogućnosti za priključenje.

Tehničke uslove za priključke JP „Vodovod i kanalizacija“ d.o.o. Zenica dužan je objaviti na svojoj web stranici u roku od 6 mjeseci od dana stupanja na snagu ove Odluke.

Član 17.

JP «Vodovod i kanalizacija» d.o.o. Zenica ne smije izvršiti priključenje objekta na javnu vodovodnu i kanalizacionu mrežu koji je izgrađen bez odobrenja za građenje. Izuzetak od ovog su objekti izgrađeni prije 1976. godine.

Član 18.

Priključenjem na javnu vodovodnu i/ili vodovodnu i kanalizacionu mrežu, vlasnik objekta postaje korisnik usluga dovođenja vode za piće i/ili odvoda fekalnih voda, odnosno postaje potrošač davaoca usluga JP«ViK» d.o.o. Zenica.

Obveznik plaćanja cijene za pruženu komunalnu uslugu iz ove Odluke je vlasnik objekta, odnosno nekretnine.

U slučaju da nekretnina nije uknjižena ili je vlasnik nekretnine mrtav ili nedostupan, onda se obaveza plaćanja pružene komunalne usluge odnosi na korisnika nekretnine.

Ukoliko je vlasnik ugovorom, ovjerenim od strane nadležnog organa, prenio pravo upravljanja nekretninom na korisnika nekretnine, onda se obaveza plaćanja za pruženu komunalnu uslugu prenosi na korisnika-upravitelja.

Član 19.

Priključak kućnih vodovodnih i kanalizacionih instalacija i uređaja na javnu vodovodnu i kanalizacionu mrežu, po pismenom zahtjevu vlasnika objekta, odnosno investitora, vrši JP «ViK» d.o.o. Zenica.

Zahtjevi za priključenje objekata na javni vodovod i/ili javnu kanalizaciju i prijave potrošača zbog nastalih promjena vlasništva nad objektima koji su već priključeni na javni vodovod i/ili kanalizaciju podnose se na obrascima koje kreira JP«ViK» d.o.o. Zenica.

JP «Vodovod i kanalizacija» d.o.o. Zenica je dužno izvršiti priključak ako su ispunjeni svi uslovi iz ove odluke i uslovi u pogledu izvedbe kućnih instalacija, i ako podnosilac zahtjeva do momenta podnošenja nije izazvao spor koji u skladu sa ovom Odlukom daje pravo JP «ViK» d.o.o. Zenica da uskrati pravo pružanja daljih usluga (npr. podnosilac zahtjeva bespravno se priključio i koristio vodu ili odvođenje kanalizacije, a nije izmirio obaveze koje iz tog proističu; podnosilac zahtjeva već koristi javni vodovod i kanalizaciju za potrebe drugog objekta a za to ne izmiruje obaveze itd.).

Član 20.

U slučaju da JP «Vodovod i kanalizacija» d.o.o. Zenica odbije da izvrši priključenje iz predhodnog člana, Služba za komunalne poslove i ekologiju općine Zenica, na pismeni zahtjev tražioca priključka ili po vlastitoj inicijativi obrazuju stručnu komisiju od najmanje tri člana, od kojih obavezno jedan član mora biti iz Službe za prostorno uređenje i jedan član predstavnik JP «ViK» d.o.o. Zenica. Komisija ispituje i razrješava dotični slučaj.

Član 21.

Na javni vodovod i javnu kanalizaciju po pravilu se priključuje direktnim priključkom kućna instalacija svakog potrošača. Vodomjerno okno glavnog vodomjera u pravilu mora biti na javnoj površini i lokaciju određuje JP «ViK» d.o.o. Zenica.

U izuzetnim slučajevima, spoj se može izvesti posredno i to samo onda kada vođenje priključka do javnog vodovoda odnosno kanalizacije zahtijeva složene investicione zahvate i kada se pri tom ne ugrožavaju normalni uslovi korištenja vode ili odvod otpadnih voda za potrošača čija se instalacija treba koristiti kao posredan spoj drugog potrošača. Ova veza mora biti izvedena uz saglasnost vlasnika kućne instalacije koja se koristi za posredan spoj.

U slučajevima iz prethodnog stava količina vode potrošena preko vodomjera posredno priključenog potrošača umanjuje se (odbija se) od ukupno očitane količine na vodomjeru potrošača koji je priključen direktno (neposredno) na javni vodovod.

Potrošač nema pravo bez pismene saglasnosti JP «ViK» d.o.o. Zenica ni pod kakvim uslovima dati pravo, odnosno dozvoliti drugom licu da preko njegovih kućnih instalacija koristi usluge JP «ViK» d.o.o. Zenica za korištenje vode za piće i/ili odvod fekalija makar pri tom dotični potrošač JP «ViK» d.o.o. plaćao usluge koje je koristilo drugo lice.

U slučaju da javni vodovod odnosno kanalizacija nije uz objekat čija se unutrašnja (kućna) instalacija treba priključiti, odnosno kada se između njih nalazi zemljište drugog vlasnika, priključenje se može izvesti samo uz pismenu saglasnost vlasnika tog zemljišta.

U slučajevima iz predhodnog stava, imovinske odnose je obavezan riješiti zainteresirani vlasnik objekta.

Član 22.

Snabdijevanje vodom iz vodovoda na području grada, gdje nema javne kanalizacije može se dozvoliti samo pod uslovom da je predhodno obezbjeđen odvod otpadnih voda u propisno izvedenu septičku jamu.

Budući potrošač mora imati izgrađenu vodonepropusnu septičku jamu po svim propisima, a prema uslovima koje odredi nadležna komunalna služba.

Septičke jame ne smiju imati nikakve preljeve, kojima bi se sadržaj izlijevao na okolnu površinu ili otvoreni ili zatvoreni vodotok.

Član 23.

Zabranjeno je samovoljno priključenje na vodovodnu i kanalizacionu mrežu. Ako se takav priključak izvede, JP «ViK» d.o.o. Zenica će priključak isključiti na trošak samovoljnog priključioca i protiv istog pokrenuti postupak pred sudom.

JP «Vodovod i kanalizacija» d.o.o. Zenica će postupiti na način iz stava 1. ovog člana i u slučaju kad potrošač i korisnik koji bez njegovog odobrenja na svom objektu ili zemljištu izvedu nove interne

vodovodne i kanalizacione instalacije ili ih rekonstruišu i bez odobrenja JP «ViK» d.o.o. Zenica priključe nove objekte.

Za ponovo priključenje na gradski vodovod i kanalizaciju bespravni korisnici iz ovog člana dužni su JP «ViK» d.o.o. Zenica podnijeti pismeni zahtjev za priključak odnosno, odobrenje izvedenih instalacija.

JP «ViK» d.o.o. Zenica će usloviti priključak obavezom plaćanja svih troškova koji su nastali preduzeću kao i utrošak vode i naknadu za kanalizaciju za period samovoljnog ilegalnog korištenja, a prema normativima koje utvrđuje Nadzorni odbor JP «ViK» d.o.o. Zenica.

Član 24.

Za održavanje izvedenih priključaka, izvođenje opravki i promjena na vodovodnom i kanalizacionom priključku obavezno je i nadležno JP «ViK» d.o.o. Zenica u skladu sa stavom 1. i 2. člana 2. ove odluke.

Član 25.

Svaki kvar ili štetu na vodovodnom i kanalizacionom priključku i na vodomjeru, potrošač je dužan prijaviti JP «ViK» d.o.o. Zenica u roku od 24 sata, a JP «ViK» d.o.o. Zenica je dužno najkasnije u roku od 48 sati od prijave nastalog kvara isti otkloniti.

Za objekte zajedničkog stanovanja (u zgradama) pod pojmom «potrošač» iz ovog člana podrazumjeva se skup etažnih vlasnika, odnosno njegov predsjednik.

Član 26.

Oštećenja i smetnje na javnom vodovodnom i kanalizacionom priključku nastali krivicom ili nepažnjom potrošača JP «ViK» d.o.o. Zenica popravlja o trošku potrošača.

U objektima kolektivnog stanovanja sa zajedničkim vodomjerom i u naseljima gdje se više potrošača (domaćinstava) snabdijeva preko zajedničkog vodomjera, troškovi se raspoređuju na sve potrošače proporcionalno njihovoj pojedinačnoj fakturi u predhodnom obračunskom periodu.

Pod oštećenjem nastalim krivicom potrošača smatraju se između ostalog i oštećenje plombe, pucanje stakla, i vodomjera i pucanje ventila u oknu zbog smrzavanja, razbijeno staklo na vodomjeru te otuđenje odnosno nestanak vodomjera iz bilo kojeg razloga.

U slučajevima iz stava 1. i 2. ovog člana JP «ViK» d.o.o. Zenica će sačiniti zapisnik o izvršenom uviđaju u prisustvu korisnika pod uvjetom da to korisnik želi. Zapisnik o izvršenom uviđaju dostavlja se i potrošaču.

U svim slučajevima oštećenja nastalim krivicom potrošača, a koje tretira ovaj član, JP «ViK» d.o.o. Zenica će nakon izvršenog uviđaja izvršiti potrebne nabavke materijala, montažu i sve druge radnje za dovođenje u ispravno stanje, a sve troškove fakturirati dotičnom potrošaču odnosno potrošačima a ako se radi o zajedničkom vodomjeru.

Za slučajeve smanjenja obračunate vode po uzrocima iz ovog i predhodnog člana JP «ViK» d.o.o. Zenica će izvršiti preračun naknada za vodu i kanalizaciju prema prosjeku od 6 mjeseci iz perioda koji je predhodio nastaloj šteti.

Član 27.

Svi priključni vodovi do vodomjera i vodomjeri na priključnim vodovima (glavni vodomjeri) su sredstva JP «ViK» d.o.o. Zenica, bez obzira o čijem su trošku izvedeni pa ih je JP «ViK» d.o.o. Zenica dužan održavati o svom trošku, osim u slučajevima iz člana 26. stav 1. i 2. ove Odluke.

Glavni vodomjer (vodomjer na priključnom vodu) predstavlja granicu između javnog vodovoda i kućne instalacije s tim što glavni vodomjer pripada javnom vodovodu.

Svaki vodomjer postavljen na kućnu instalaciju iza glavnog vodomjera (spojen u seriju sa glavnim vodomjerom) predstavlja interni vodomjer i sastavni je dio kućne instalacije i dužan ga je održavati potrošač odnosno vlasnik kućne instalacije.

Vlasnik kućne instalacije, odnosno etažni vlasnici-potrošači, dužni su održavati elektro instalacije daljinskog očitavanja pojedinačnih-internih vodomjera, tj.sistem daljinskog očitavanja zaključno sa M-BUS stanicom ili završnom radio centralom predmetnog objekta.

IV VODOMJERI, POTROŠNJA I PLAĆANJE

Član 28.

Potrošnja vode mjeri se po pravilu, vodomjerom. U slučaju da je vodomjer privremeno neispravan, potrošnja vode određuje se prema prosjeku potrošnje vode u predhodnih šest mjeseci, kada je vodomjer bio ispravan.

Potrošnja vode čitavog objekta mjeri se jednim vodomjerom na priključku objekta, ako ovom odlukom za određene slučajeve nije drugačije utvrđeno.

U objektima zajedničkog stanovanja (zgrade) i u dijelovima naselja gdje se više potrošača (domaćinstava) snabdijeva preko zajedničkog vodomjera obračun utroška vode pojedinih potrošača vrši se proporcionalno broju korisnika kod pojedinih potrošača (domaćinstava).

U poslovnim prostorima gdje se snabdijevanje vrši preko zajedničkog vodomjera obračun utroška vode pojedinih potrošača vrši se na osnovu pismenog sporazuma između potrošača o udjelima izraženim u procentima ukupne potrošnje očitane na zajedničkom vodomjeru. Sporazum će se smatrati validnim ako ga potpiše više od pola potrošača na dotičnom zajedničkom vodomjeru. Sve dok dotični potrošači ne potpišu sporazum, JP«ViK»d.o.o. Zenica će obračun utroška vode (usluga) vršiti na sve potrošače jednako.

Član 29.

U stambenim blokovima, sa više odvojenih stubišta, za svako stubište može se ugraditi poseban vodomjer, kao glavni ili kao interni-pojedinačni. Glavni je u slučaju ako se nalazi direktno na priključnom vodu javnog vodovoda, a interni ako se nalazi na kućnoj instalaciji tj. u seriji iza glavnog vodomjera za zgradu.

Član 30.

Za jedan objekat odnosno stubište moraju se ugraditi dva ili više vodomjera, ukoliko ima potrošača koji plaćaju različite jedinične cijene za korištenje vode, različite tarife.

Poslovni prostori moraju posjedovati zaseban vodomjer, a mjesto postavljanja istog određuje JP «ViK» d.o.o. Zenica. Vodomjeri za poslovne prostore u pravilu postavljaju se na javnoj površini izvan poslovnog prostora sa direktnim priključkom na javni vodovod, a samo iznimno, ako bi naprijed navedeno iziskivalo enormno visoke troškove, mogu se postaviti unutar poslovnog prostora i/ili priključiti posredno, tj. iza glavnog vodomjera.

Član 31.

U objektima kolektivnog stanovanja (u zgradama) vlasnici stanova (potrošači) koji su se do donošenja ove Odluke snabdijevali vodom preko zajedničkog, glavnog vodomjera imaju pravo na ugradnju pojedinačnih-internih vodomjera za stambenu jedinicu, uz uslov da se ugradnja pojedinačnih vodomjera izvrši u sve stambene jedinice u okviru stambenog objekta, odnosno onog dijela stambenog objekta (stubište) koje ima zajednički, glavni vodomjer.

Troškove ugradnje pojedinačnih –internih vodomjera snose vlasnici stanova i poslovnih prostora tj. potrošači.

Vodomjeri moraju biti povezani u jedan od sistema daljinskog očitavanja (M-BUS ili radijski).

M-BUS ili završne radio centrale moraju se montirati u stubištima objekata (na mjestu pristupačnom za očitavanje) i moraju biti pripremljene za daljinski prenos podataka (GPRS ili radio i sl.) i imati displej za očitavanje na licu mjesta. Glavni vodomjeri, takođe, moraju biti povezani u izabrani način daljinskog očitavanja.

Vrstu, tip i proizvođača vodomjera i predmetnih centrala, te ostale smjernice određuje JP“ViK“d.o.o. Zenica, prilikom izdavanja saglasnosti na lokaciju.

JP“ViK“d.o.o. Zenica će u evidenciji potrošača evidentirati sve pojedinačne-interne vodomjere iza glavnog vodomjera istovremeno i to na osnovu spiska dobijenog od predsjednika kućnog savjeta, savjeta mjesne zajednice ako kućni savjet nije konstituisan ili na osnovu izvršenog uviđaja i popisa od strane uposlenika JP“ViK“d.o.o. Zenica.

Pojedinačni-interni vodomjeri za stanove u novoprojektovanim stambenoposlovnim objektima kolektivnog stanovanja ili stambenim objektima kolektivnog stanovanja, koji budu građeni poslije stupanja na snagu ove Odluke, moraju se montirati isključivo u sandučićima u stubištu i isti se moraju povezati u jedan od sistema daljinskog očitavanja (M-BUS ili radijski). Glavni vodomjeri takođe moraju biti povezani na centralu izabranog načina daljinskog očitavanja.

Poslovni prostori u novoprojektovanim stambenoposlovnim objektima kolektivnog stanovanja ili u poslovnim objektima koji budu građeni poslije stupanja na snagu ove Odluke moraju imati pojedinačne-interne vodomjere koji moraju biti smješteni u oknima na javnoj površini i moraju biti povezani u jedan od sistema daljinskog očitavanja (M-BUS ili radijski). Glavni vodomjeri takođe moraju biti povezani na centralu izabranog načina daljinskog očitavanja.

M-BUS ili završne radiocentrale moraju se montirati u stubištima objekata (na mjestu pristupačnom za očitavanje) i moraju biti pripremljene za daljinski prijenos podataka (GPRS ili radio i sl.) i imati displej za očitavanje na licu mjesta.

Obaveza investitora objekata, koji budu građeni poslije stupanja na snagu ove Odluke je ugradnja i puštanje u rad pojedinačnih-internih vodomjera i sistema daljinskog očitavanja, primopredaja izvedenog stanja JP“ViK“d.o.o. Zenica (uz zapisnik) i dostava podataka o budućim vlasnicima stanova i poslovnih prostora JP“ViK“d.o.o. Zenica.

Kod obračuna potrošnje vode zbir potrošnje pojedinačnih vodomjera se usaglašava, sravnjava, sa očitanoj potrošnjom vode na glavnom vodomjeru, a eventualna razlika raspodijelit će se na sve potrošače proporcionalno očitanoj potrošnji na individualnim vodomjerima. Pod pojmom „eventualna razlika“ iz ovog stava podrazumijeva se gubitak vode nastao na kućnim instalacijama dotičnog objekta iza glavnog vodomjera.

Veliki poslovni centri koji budu građeni poslije stupanja na snagu ove Odluke moraju imati najmanje jedan glavni vodomjer za sanitarne potrebe i jedan za unutrašnju hidrantsku mrežu, poželjno je da svaki poslovni prostor ima svoj pojedinačni-interni vodomjer.

Obračun potrošnje će se vršiti na osnovu stanja na glavnom ili glavnim vodomjerima i fakturisati vlasniku poslovnog centra ili upravitelju poslovnog centra, ako u dotičnom poslovnom centru ima više vlasnika, odnosno suvlasnika.

U jednom vodomjernom oknu ili sandučiću može biti više vodomjera.

Član 32.

Pojedinačni vodomjeri za stambene jedinice u okviru stambenog objekta kolektivnog stanovanja spadaju u opremu stambene jedinice, jer se nalaze na kućnoj instalaciji, a njihovu nabavku, troškove ugradnje, održavanja i baždarenja, odnosno zamjene snosi vlasnik stambene jedinice, odnosno potrošač.

Vlasnik stambene jedinice, iz stava 1. ovog člana prilikom nabavke, ugradnje, eksploatacije, funkcionisanja i baždarenja obavezan je pridržavati se tehničkih normativa, standarda, zakonskih propisa i uputstava JP «ViK» d.o.o. Zenica.

Pojedinačni vodomjeri moraju biti dostupni za očitavanje sa stubišta. Navedeno znači klasični vodomjeri moraju biti ugrađeni u stubištu ili digitalni vodomjeri ugrađeni u stanu, a uređaj za očitavanje smješten na stubištu.

Član 33.

Ugradnja glavnog vodomjera se vrši neposredno uz glavni vod javnog vodovoda na mjestu priključka ili na drugom pogodnom mjestu, u pravilu na javnoj površini i u vodomjernom oknu. Samo u iznimnim slučajevima vodomjerno okno odnosno vodomjerno mjesto može biti na/u privatnom posjedu.

Član 34.

Okno za smještaj vodomjera mora biti snabdijeveno propisanim poklopcem izgrađenim od livenog gvožđa ili čeličnog lima potrebne nosivosti, sa specijalnom bravom, kako je tipizirano od strane JP«ViK»d.o.o.Zenica.

Član 35.

Potrošač je dužan uvijek omogućiti nesmetan pristup vodomjeru, bez obzira na mjesto na kojem se vodomjer nalazi.

Član 36.

Okno izgrađeno prije stupanja na snagu ove Odluke u kome je otežan rad oko izmjene, održavanja i očitavanja vodomjera, potrošač je dužan prilagoditi tipskom oknu propisanom od JP «ViK» d.o.o. Zenica najkasnije u roku od šest mjeseci, računajući od prijema pismenog zahtjeva JP «ViK» d.o.o. Zenica. Za slučaj da potrošač ne postupi po zahtjevu JP«ViK“d.o.o. Zenica u navedenom roku, tada će JP“ViK“d.o.o. Zenica izvesti potrebne radove i nastale troškove naplatiti od potrošača.

U slučaju da zbog neodržavanja okna u ispravnom stanju prijeti opasnost od zagađivanja vode JP «ViK» d.o.o. Zenica, ima pravo obustaviti snabdijevanje vodom dok se okno ne osposobi.

Član 37.

Zamjenu glavnih vodomjera vrši JP «ViK» d.o.o. Zenica.

Kontrolu, održavanje, baždarenje i zamjenu glavnih vodomjera na propisan način i o svom trošku vrši JP «ViK» d.o.o. Zenica, a kontrolu, održavanje, baždarenje i zamjenu internih vodomjera vrše potrošači o svom trošku i u skladu sa važećim zakonskim propisima i tehničkim normativima što su dužni dokazati JP“ViK“d.o.o. Zenica.

Ako je do oštećenja došlo krivicom ili nepažnjom potrošača, opravka vodomjera vrši se na njegov trošak.

Član 38.

Obračun potrošnje vode neće se vršiti na osnovu stanja internog vodomjera koji nije odobren atestom Zavoda za mjeriteljstvo BiH, i na kojem nema plombe, kao dokaza važećeg baždarenja.

U slučaju iz stava 1. potrošnja dotičnog potrošača odredit će se na osnovu razlika potrošnje preko glavnog vodomjera i zbira svih ispravnih (validnih) vodomjera ostalih potrošača u dotičnom objektu u skladu sa članom 32. ove Odluke, a ako je i to iz bilo kojih razloga nemoguće, obračun se vrši prema prosječnoj potrošnji dotičnog potrošača u posljednjih šest mjeseci kada je interni vodomjer bio validan.

Član 39.

Potrošnja vode utvrđuje se prema razlici stanja brojila vodomjera na kraju i početku obračunskog razdoblja, s tim da se čitaju samo cijeli kubni metri utrošene vode.

Član 40.

Potrošač ima pravo podnijeti pismeni zahtjev JP «ViK»-u d.o.o. Zenica za provjeru ispravnosti vodomjera i tačnosti očitavanja.

Potrošač je dužan uz pismeni zahtjev za provjeru ispravnosti vodomjera priložiti primjerak uplatnice o izvršenoj uplati JP «ViK» d.o.o. Zenica za stvarne troškove provjere ispravnosti.

Na zahtjev iz predhodnog stava JP «ViK» d.o.o. Zenica, je u roku od pet dana dužan demontirati vodomjer i dostaviti na kontrolu neposredno poslije demontaže.

Smatra se da je vodomjer ispravan ako odstupanja mjerenja potrošnje vode nisu veća od – + 3%.

Član 41.

U slučaju odstupanja većih od – + 3% vrši se ispravljanje obračunatog iznosa za vodu prema visini ustanovljenog odstupanja samo u slučaju da je potrebna ispravka u korist potrošača. Znači ako je vodomjer pokazivao manju potrošnju od stvarne, JP «ViK» d.o.o. Zenica nema pravo vršiti ispravku u svoju korist, a na štetu potrošača.

Za obračun se uzima najveće odstupanje između gornje i donje granice tačnosti pokazivanja, a obračunati iznos može se ispraviti samo za vrijeme u kojem je vodomjer neispravno pokazivao i to srazmjerno prema evidentiranoj potrošnji, ali najviše za 90 dana, od dana uredno podnesenog zahtjeva za provjeru ispravnosti.

Način obračuna iz predhodnog stava primjenjuje se i kada se vremensko razdoblje neispravnog pokazivanja potrošnje ne može tačno utvrditi.

Osnova za procjenu je srednja potrošnja u posljednja tri mjeseca kada je vodomjer ispravno pokazivao potrošnju vode.

Ako je odstupanje vodomjera veće od dozvoljenog na štetu potrošača, JP «ViK» d.o.o. Zenica će u roku od 7 dana po dobijenom protokolu o ispitivanju, potrošaču vratiti sredstva uplaćena za troškove kontrole. Ako je vodomjer bio ispravan ili je pokazivao potrošnju manju od stvarne, troškove kontrole vodomjera snosi potrošač.

Član 42.

Potrošnja vode na javnim površinama (polijevanje, pranje ulica, parkova i sl.) obračunava se takođe na osnovu vodomjera. Navedeno znači da svaka potrošnja vode, makar i od javnog interesa mora biti mjerena i fakturisana.

Izuzetak predstavlja samo voda za tehnološke potrebe JP «ViK»-a d.o.o. Zenica i gašenja požara sa hidranata sa javnih površina.

Korištenje vode i kanalizacije za gradilište i građenje preko privremenog gradilišnog priključka obračunava se po stvarnoj potrošnji i tarifniku za kategoriju „privreda“.

Član 43.

Očitavanje vodomjera vrše ovlašćeni uposlenici JP «ViK» d.o.o. Zenica, koji su na zahtjev potrošača dužni pokazati pismeno ovlaštenje, odnosno validnu akreditaciju JP«ViK» d.o.o. Zenica.

Stanje brojila na vodomjeru očitava se po rasporedu koji određuje JP «ViK» d.o.o. Zenica.

Očitavanje vodomjera koji se nalaze na privatnim posjedima ili u objektima u pravilu može se vršiti u vremenu od 7 – 15 sati.

Očitavanje iz prethodnog stava se može vršiti i u drugom vremenu uz prethodnu obavijest potrošača, odnosno kućnih savjeta zgrade.

Član 44.

Potrošač je dužan omogućiti očitavanje vodomjera. Ako krivicom potrošača ovlaštenu uposlenicu JP «ViK» d.o.o. Zenica nije mogao izvršiti očitavanje vodomjera, potrošnja vode za taj mjesec (ili mjesečni period) određuje se procjenom na osnovu prosječne potrošnje u posljednjih šest mjeseci (potrošača ili slične grupe potrošača), a definitivno prilikom slijedećeg očitavanja. Ako potrošač ne omogući očitavanje vodomjera i slijedeći put ili dva puta u toku godine JP«ViK» d.o.o. Zenica ima pravo da uskrati dalje pružanje usluge i da podnese prekršajni nalog, odnosno pokrene prekršajni postupak.

JP«ViK» d.o.o. Zenica će uskratiti pružanje usluga sve dok dotični potrošač ne otkloni uzrok zbog kojeg je uskraćena usluga i o tom pismeno izvijesti JP«ViK» d.o.o. Zenica.

Član 45.

Vlasnik objekta, odnosno prijavljeni potrošač dužan je plaćati naknadu za utrošenu vodu i naknadu za kanalizaciju sve dok JP „ViK“-u d.o.o. Zenica ne podnese pismenu odjavu.

Odjava može biti privremena i trajna.

Kod trajne odjave potrošač je obavezan izmiriti ukupno dugovanje sa danom odjave.

Odjava i prijava podnose se JP «ViK-u» d.o.o. Zenica u pismenoj formi.

Odjava potrošača, privremena ili trajna, ne može se vršiti retroaktivno.

Član 46.

U slučaju privremene odjave potrošnje vode demontira se vodomjer i stavlja čep sa plombom, a kod trajnog otkaza demontira se vodomjer, stavlja čep sa plombom i zatvara ulični ventil ako ga ima i ako je moguće, a ako to nije moguće eliminiše se priključak vode.

Troškovi zatvaranja ventila, demontaže vodomjera i ponovna ugradnja vodomjera i otvaranja ventila, snosi potrošač. Troškovi isključenja plaćaju se prije odjave, a troškovi priključenja isti dan sa prijavom.

Ukoliko potrošač ne postupi po navedenom u prethodnom stavu JP«ViK» d.o.o. Zenica će postupiti po odjavi i nastale troškove će potraživati putem suda, a ponovno priključenje i pružanje usluge neće pružati dok potrošač ne izmiri navedene troškove.

U objektima zajedničkog stanovanja, odnosno potrošači, koji se vodom snabdijevaju preko zajedničkog vodomjera, potrošnju vode mogu odjaviti na osnovu potvrde predsjednika kućnog savjeta, uz uslov izmirenja ukupnog duga zaključno sa danom odjave.

Ako potrošač ne postupi u skladu sa prethodnim stavom JP«ViK» d.o.o. Zenica neće izvršiti privremenu odjavu, a trajnu odjavu dotičnog potrošača će izvršiti i odmah pokrenuti postupak na sudu za naplatu potraživanja.

Osim u slučajevima iz prethodnih stavova, potrošaču se može demontirati vodomjer i radi neplaćanja računa za vodu i naknade za kanalizaciju. Za svaku demontažu, odnosno skidanje i plombiranje vodomjera radi neplaćanja duga za vodu, potrošačima će se fakturisati troškovi demontaže i plombiranja i to:

- za domaćinstva 100,00 KM

- za privredu 200,00 KM

Za ponovno uključenje, nakon isključenja zbog neplaćanja, fakturiše se:

- za domaćinstva 200,00 KM
- za privredu 400,00 KM

Za skidanje plombe ili okretanja vodomjera, pored podnošenja prekršajne prijave i obračuna utrošene vode – prema šestomjesečnom prosjeku iz perioda urednog mjerenja, fakturiše se:

- za domaćinstva 300,00 KM
- za privredu 500,00 KM

Član 47.

Svaku promjenu, koja na bilo koji način utiče na evidentiranje i obračun naknada za uslugu vodosnabdijevanja i odvoda otpadnih voda, potrošač je dužan u pismenoj formi prijaviti JP «ViK» d.o.o. Zenica u roku od osam dana, od dana nastale promjene.

Radi ažuriranja evidencije i identifikacije korisnika usluga, koji po tom ima obavezu plaćanja za iskorištenu uslugu prema davaocu JP«ViK»d.o.o. Zenica, potrošači su dužni prijaviti lične podatke.

Fizička lica: prezime, ime, ime oca i izvore prihoda, kao koleteral za korištenje usluge unaprijed, a pravna lica: naziv, adresu sjedišta, ID broj i transakcijske račune na bankama.

Član 48.

U objektima zajedničkog stanovanja gdje se snabdijevanje vrši preko zajedničkog vodomjera a obračun vrši prema broju korisnika, jedini validan dokument o broju korisnika u zgradi i stanovima jeste odgovarajuća potvrda predsjednika kućnog savjeta.

Ako u zgradi ili nizu objekata sa zajedničkim vodomjerom nema kućnog savjeta potvrdu iz stava 1. može izdati savjet područne Mjesne zajednice.

Ovlaštena lica JP «ViK» d.o.o. Zenica mogu u svim slučajevima da izvrše uvid i kontrolu potrošača, broja korisnika i na bazi sačinjenog zapisnika o kontroli, izvrše unos u evidenciju potrošača utvrđene podatke, prema kojem će se vršiti obračun.

Prijava promjene broja korisnika u objektima zajedničkog stanovanja ne može se vršiti za određeno vrijeme tj. neki vremenski interval (od-do), već isključivo podnosi prijavu svaki put kad nastane promjena u skladu sa članom 48. ove Odluke.

Eventualno podnesena prijava promjene stanja za vremenski interval (od-do) biće odbačena i tretirat će se kao da nije podnesena.

Član 49.

Za korištenje usluga; za vodosnabdijevanje iz javne gradake vodovodne mreže i za korišćenje javne gradske kanalizacione mreže, odnosno za vodosnabdijevanje i odvod i tretman otpadnih voda potrošač, odnosno korisnik plaća naknadu.

Naknada za korištenje usluga sadrži varijabilne i fiksne troškove kako slijedi:

1. – varijabilni troškovi su oni troškovi koje ima davalac usluge, JP«ViK»d.o.o. Zenica, da bi mogao trajno obavljati javnu djelatnost i oni troškovi i naknade koje mora plaćati nadležnim organima u skladu sa važećim zakonskim propisima, i u funkciji su preuzete količine vode, a razvrstavaju se na slijedeći način:

- 1.1. naknada za preuzetu voduKM/m³
- 1.2. naknada za kanalizacijuKM/m³
- 1.3. posebne vodoprivredne naknade za isporučenu (zahvaćenu) vodu KM/m³
- 1.4. posebne vodoprivredne naknade za zaštitu voda KM/m³

1.5. koncesija za vodu KM/m³

Naknada za kanalizaciju računa se po kubnom metru preuzete vode.

2. – fiksni troškovi su oni troškovi koje ima davalac usluge, JP“ViK“ d.o.o. Zenica, neovisno od tog koju količinu vode preuzima potrošač, a to su:

- 2.1. očitavanje vodomjera
- 2.2. obračun potrošnje i naknada
- 2.3. štampanje faktura (računa)
- 2.4. dostava faktura (računa)
- 2.5. održavanje, baždarenje i zamjena vodomjera

Svi fiksni troškovi na fakturi trebaju biti prikazani pod jednom stavkom: „fiksni trošak“.

Član 50.

Prema vrsti, geografskom položaju i namjeni objekata potrošači se razvrstavaju u različite tarifne, odnosno potrošačke kategorije i grupe. Potrošačke kategorije su:

- 1.- kategorija: domaćinstva
2. -kategorija: ustanove
3. - kategorija: povlašteni potrošači
4. - kategorija: privreda

Potrošačke grupe se razvrstavaju prema načinu snabdijevanja vodom:

- a) – grupa na gravitaciji (voda od distributivnog rezervoara do objekta dolazi gravitacijom)
- b) – grupa na pumpnoj stanici (voda se do objekta doprema preko pumpne stanice)

Član 51.

Kod utvrđivanja cijene usluga za potrošačke kategorije iz člana 50. omjer cijena za potrošačku kategoriju „privreda“ i „domaćinstva“ može biti maksimalno 2,5:1.

Visinu naknada, osim onih propisanih zakonom, odnosno cijene usluga, po vrstama troška, te kategorijama i grupama potrošača iz člana 49. i 50. po prijedlogu Nadzornog odbora JP „ViK“ d.o.o. Zenica određuje Načelnik Općine

Pri konačnom određivanju, odnosno odobravanju cijena Načelnik Općine uzet će u obzir slijedeće:

- opšte socijalno – ekonomsko stanje u općini Zenica a posebno stanovništva grada Zenica i prigradskih naselja koja se vodom snabdijevaju sa javnog gradskog vodovoda koje tretira ova odluka.
- smjernica Međunarodne zajednice u pogledu:
 - . tarifnog sistema
 - . tretiranja vode za piće
 - . tretiranja otpadnih voda
 - . potrebe samoodrživosti preduzeća koja pružaju javne usluge
- dostignuti stepen efikasnosti preduzeća JP“ViK“ d.o.o. Zenica, potrebu jačanja i razvoja, potrebu širenja mreže instalacija vodovoda i kanalizacije, potrebe istraživanja ili obezbjeđenja novih količina vode sa novih izvorišta, potrebe i obaveze novih tretmana vode za piće ili otpadnih voda
- način obezbjeđenja sredstava za održavanje i zamjenu zatečene infrastrukture, odnosno o potrebi realizacije proste i proširene reprodukcije

- efikasnost i efektnost uprave, finansijsku snagu preduzeća, izmirenje obaveza prema uposlenicima u skladu sa kolektivnim ugovorima o plaćama.
 - i druge faktore i uticaje na određivanje cijena za pruženu uslugu vodovoda i kanalizacije propisane čl.19. Zakona o komunalnim djelatnostima ZE-DO Kantona („SL. Novine ZE-DO Kantona“ br.: 17/08)
- Politika cijena usluga treba obezbijediti da davalac usluga, u ovom trenutku JP „ViK“ d.o.o. Zenica, bude osposobljeno za trajno, efikasno i efektno pružanje usluga vodovoda i kanalizacije iz naplaćenih sredstava za pruženu uslugu potrošačima i po cijenama koje su primjerene parametrima navedenim u ovom članu i primjerene cijenama istih usluga u najmanje pet najvećih gradova u BiH.

Član 52.

JP «ViK» d.o.o. Zenica je dužno svakog mjeseca dostavljati račune za utrošenu vodu i naknadu za kanalizaciju i ostale naknade u vezi sa izvršenom uslugom.

JP «ViK» d.o.o. Zenica je obavezan dostavljati račune potrošačima do 20.-tog dana tekućeg mjeseca za prethodni mjesec. Ako potrošač ne zaprimi račun za obračunati period u navedenom roku dužan je o tome obavijestiti davaoca usluge najkasnije do 30.-tog dana tekućeg mjeseca, a davalac usluge je dužan izdati kopiju računa bez posebne naknade.

Potrošači su u obavezi plaćati za pruženu uslugu svakog mjeseca a najduže 8 dana po prijemu računa, odnosno u roku od 20 dana od dana štampanja računa.

Član 53.

Kriterije, normative i cjenovnike usluga koje pruža JP «ViK» d.o.o. Zenica, osim onih iz člana 51.(izvođenje kućnih priključaka, čišćenje septičkih jama, proštopavanje ili sanacija kućnih instalacija, takse, itd), na osnovu prijedloga Uprave, utvrđuje Nadzorni odbor JP «ViK» d.o.o. Zenica.

Član 54.

Potrošači-domaćinstva, kod kojih se potrošnja ne mjeri vodomjerima, ni zasebnim ni zajedničkim, plaćaju paušalnu naknadu za utrošenu vodu i korištenje kanalizacione mreže prema broju članova domaćinstva, a na bazi prosječne potrošnje u predhodnoj godini za istu vrstu objekata u gradu.

JP«ViK» d.o.o. Zenica je obavezan provoditi potrebne mjere da se smanjuje broj potrošača koji za pruženu uslugu plaćaju paušalno.

Član 55.

Svi budući potrošači, prije priključenja na vodovodnu i kanalizacionu mrežu, dužni su uplatiti priključnu taksu u iznosu i normativima koje utvrđuje Nadzorni odbor JP „ViK“ d.o.o. Zenica. Priključna taksa podrazumijeva ranija ulaganja u infrastrukturu (vodovodnu i/ili kanalizacionu) i stvaranje općih tehničkih uslova za priključenje novih potrošača. Priključnu taksu potrošač plaća jednom.

Član 56.

JP«ViK» d.o.o. Zenica je obavezno u Naplatnoj službi imati šalter i službenika za usmene i direktne reklamacije potrošača. Za slučaj da nisu zadovoljni obrazloženjem i objašnjenjem na šalteru za reklamacije ili se ne žele usmeno obraćati, prigovore odnosno reklamacije na pruženu uslugu i izvršeni obračun potrošnje vode i korištenje kanalizacije potrošači podnose JP «ViK» d.o.o. Zenica pismenim putem u roku od 15 dana od dana dostave računa, odnosno u roku od 30 dana od dana izdavanja, štampanja računa. Uz reklamaciju, podnosilac je obavezan priložiti kopiju računa koji reklamira odnosno iz perioda na koji se prigovor odnosi.

JP «ViK» d.o.o. Zenica je dužno dati pismeni odgovor na reklamacije najkasnije u roku od 15 dana od dana prijema iste. Ukoliko JP „ViK“ d.o.o. Zenica propusti ovaj rok podnosilac ima pravo na sudsku zaštitu.

Prigovori i reklamacije koje nisu podnesene u skladu sa stavom 1. ovog člana JP«ViK“ d.o.o. Zenica ima pravo odbaciti kao neblagovremene ili nepotpune, o čemu je JP «ViK» d.o.o. Zenica dužno donijeti zaključak i dostaviti podnosiocu.

V OSLOBAĐANJE OD PLAĆANJA NAKNADE ZA UTROŠENU VODU

Član 57.

U slučaju gubitaka vode zbog skrivenih kvarova koje potrošač nije mogao uočiti prije nego je dobio račun za vodu na kojem je to vidljivo u poređenju sa prethodnim periodom, a do kojih je došlo bez krivice potrošača usljed:

- kvara na vezi kod vodomjera,
- na samom vodomjeru,
- kvara na ventilu neposredno iza vodomjera u vodomjernom oknu,
- pucanja stakla usljed pritiska vode (ali ne zbog smrzavanja),
- i dr.(više sile koju potrošač nije mogao blagovremeno uočiti).

JP«ViK“d.o.o. Zenica će na pismeni zahtjev ili molbu potrošača osloboditi plaćanja naknade za tako izgubljenu vodu.

Potrošač ima pravo iz prethodnog stava samo ako ne kasni sa uplatama naknade više od dva mjeseca i samo na gubitke vode zbog skrivenog kvara ako je gubitak trajao maksimalno u periodu dva uzastopna očitavanja vodomjera (maksimalno 2 mjeseca). Navedeno znači da je potrošač po dobijanju računa za vodu uočio veliku neopravdanu potrošnju preko vodomjera i u periodu do slijedećeg očitavanja vodomjera poduzeo mjere, otklonio skriveni kvar i dalju potrošnju sveo u normalne granice (prema prethodnoj šestomjesečnoj potrošnji). Ako je potrošač propustio blagovremeno otkloniti kvar, pa je gubitak vode zašao u treći mjesec, potrošač nema pravo oslobađanja plaćanja ni za prva dva mjeseca.

Uz pismenu molbu potrošač je obavezan dostaviti kopiju računa za period za koji traži oslobađanje, kopiju uplatnice za taksu za obradu zahtjeva i dokaze ako ih ima da se radilo o skrivenom kvaru. Potrošač je dužan na objektu sačuvati tragove i dokaze skrivenog kvara do dolaska komisije iz JP „ViK“ d.o.o. Zenica.

Uprava JP „ViK“ d.o.o. Zenica je dužna u vezi sa postupanjem po ovom članu u roku od 15 dana izraditi pisano uputstvo ili proceduru.

Član 58.

Iz javnih hidranata(hidranata sa javnih površina) vodu smiju uzimati samo vatrogasne jedinice u vrijeme intervencije, a sva druga uzimanja mogu se vršiti izričito i samo uz pismenu saglasnost JP «ViK» d.o.o. Zenica i pri tom propisani način naknade.

Voda iz javnog vodovoda se može uzimati samo sa određenih namjenskih opskrbnih mjesta ispred kojih su ugrađeni vodomjeri i ispunjeni uslovi sanitarne bezbjednosti vode.

Troškove izgradnje instalacija sa vodomjerom i uređenjem javne površine snose korisnici vode iz predhodnog stava.

VI ZAŠTITNE MJERE

Član 59.

Zabranjeno je bilo kojem licu, fizičkom ili pravnom, osim JP „ViK“ d.o.o. Zenica, izvođenje bilo kakvog priključka na javni vodovod i javnu kanalizaciju, kao i bilo kakvo ulaženje u vodovodna okna (šahtove) diranje zaporne upravljačke ili spojne armature, cjevovoda i drugih uređaja.

Izuzetno od naprijed navedenog, potrošač smije izvršiti kontrolu stanja „svog“ vodomjera, vršiti preventivno održavanje vodomjernog okna u skladu sa članom 3. te vršiti intervencije na ventilu iza vodomjera i dalje.

Voda u javnom vodovodnom sistemu grada Zenica, u smislu odredbe člana 10. Zakona o vlasničko-pravnim odnosima („Službene novine FBiH“, broj: 6/98) smatra se pokretnom stvari.

Javno preduzeće „Vodovod i kanalizacija“ d.o.o. Zenica, na osnovu Rješenja o davanju koncesije br:UP-I-07-25-35/02 od 27.05.2002.godine, izdatog od strane Federalnog ministarstva poljoprivrede, vodoprivrede i šumarstva, ima pravo vlasništva nad vodom iz predhodnog stava.

Član 60.

Investitor ili korisnik objekta je dužan prije priključenja objekta na vodovodnu mrežu izvršiti ispiranje i dezinfekciju kućnih instalacija vodovoda, počevši od vodomjera pa do svih curnih mjesta. Za eventualne posljedice zbog neispravnih i nedezinfikovanih kućnih vodovodnih instalacija posljedice snosi investitor, odnosno vlasnik objekta.

JP «Vodovod i kanalizacija» d.o.o Zenica je dužno prije priključenja objekta na vodovodnu mrežu izvršiti ispiranje i dezinfekciju priključnog voda počevši od priključka na glavni vod do glavnog vodomjera.

Ako potrošač pismeno zatraži od JP „ViK“ d.o.o. Zenica da mu izvrši ispiranje i dezinfekciju kućnih vodovodnih instalacija, JP „ViK“ d.o.o. Zenica je obavezan da dostavi ponudu za tu uslugu po normativima koje je utvrdio Nadzorni odbor preduzeća, i ako potrošač izvrši uplatu sredstava po datoj ponudi, JP „ViK“ d.o.o. Zenica je dužan da izvrši uslugu i o izvršenom poslu potrošaču izda potvrdu.

Član 61.

JP «Vodovod i kanalizacija» d.o.o Zenica ima isključivo pravo otvaranja i zatvaranja ventila na ulici i ispred vodomjera.

Potrošač može zatvoriti ventil iza vodomjera u slučaju kvara ili popravke na kućnoj vodovodnoj instalaciji.

Zatvaranje ventila ispred vodomjera potrošač može izvršiti samo u slučaju uočavanja kvara vodomjera, ili ventila iza vodomjera ali je o tome najkasnije u roku od 24 sata dužan pismeno obavijestiti JP «ViK» d.o.o. Zenica.

Član 62.

Potrošač je dužan kućne vodovodne i kanalizacione instalacije zaštititi od oštećenja i kvarova na način da služe trajnoj namjeni, te blagovremeno preduzeti mjere da se vodomjerno okno sa komplet armaturom i dio vodovodnog priključka iza vodomjera kao i kućne vodovodne i kanalizacione instalacije zaštite od smrzavanja.

Član 63.

U cilju omogućavanja kontrole vodovodne i kanalizacione mreže i instalacija uposlenicima JP «ViK» d.o.o. Zenica, koji imaju pismeno ovlaštenje, mora se omogućiti slobodan pristup na sve dijelove nekretnina i u sve objekte u kojima su postavljene vodovodne i kanalizacione instalacije preko kojih se vrši snabdijevanje vodom, odnosno odvodnja otpadne vode.

Ako se uposlenicima JP «ViK» d.o.o. Zenica ometa izvršavanje u vezi sa radnjama navedenim u stavu 1. uposlenici su ovlašteni da zatraže pomoć nadležnih inspeksijskih organa i nadležnog organa unutrašnjih

poslova, odnosno Policijske uprave Zenica, a ovi su obavezni da u tim slučajevima se odazovu i postupe u skladu sa svojim nadležnostima i propisima ove odluke.

Član 64.

U kanalizacionu mrežu zabranjeno je ispuštati ili ubacivati:

smeće, pepeo, gips, cement, pijesak, trosku, led, krpe, snijeg, uginule životinje, i perad, kao i sve druge čvrste i kabaste predmete i materijale, bilo preko kućne kanalizacione mreže ili preko uličnih slivnika i revizionih okana.

JP «ViK» d.o.o. Zenica može u izuzetnim slučajevima, na naročito pripremljenim mjestima odobriti ubacivanje snijega i leda u kanalizaciju. Ova radnja se može izvoditi samo u prisustvu i pod kontrolom ovlaštenih lica JP „ViK“ d.o.o. Zenica.

Smeće i drugi otpaci skupljeni čišćenjem ulica, trgova, pijaca i drugih javnih površina, takođe se ne smiju ubacivati u slivnike i kanalizacionu mrežu.

U kanalizacionu mrežu zabranjeno je ubacivati i ispuštati zapaljive i druge predmete koji mogu izazvati požar, eksplozije i ugroziti kanalizacionu mrežu i njeno funkcionisanje.

Član 65.

Voda i sve druge tečnosti koje imaju temperaturu veću od 35°C, ili koje sadrže škodljive kiseline, alkalije i sl. ne smije se ispuštati u kanalizacionu mrežu, a vode od kondenzacije i vode korištene za rashlađivanje parnih kotlova i iz zanatskih i industrijskih radionica mogu se ispuštati u kanalizacionu mrežu samo ako zadovolje propise o zaštiti voda.

Tečnosti koje sadrže predmete i materijale koji se ne smiju ispuštati u kanalizacionu mrežu, mogu se ispuštati jedino ako se prethodno iz njih odstrane predmeti i škodljive materije. Sve pojedinosti o otpadnim vodama definisane su Zakonom o vodama.

Član 66.

Vlasnici septičkih jama dužni su na vrijeme zatražiti čišćenje (pražnjenje) kako ne bi došlo do prelijevanja, a time i zagađivanja okoline.

Član 67.

Odvoz fekalija JP „ViK“ d.o.o. Zenica mora vršiti specijalnim vozilima iz kojih se fekalije ne mogu prosipati.

Član 68.

Prijenos posjeda nad nekretninom, objektom i zemljištem na kojem se nalazi nekretnina, u Katastarskom uredu općine Zenica se ne smije provesti ako prethodni posjednik objekta nije izmirio obaveze za vodu i kanalizaciju nastale na objektu čiji se prijenos traži. Uz zahtjev za prijenos posjeda podnosilac je obavezan priložiti potvrdu JP „ViK“ d.o.o. Zenica, kojom se dokazuje ispunjenje uslova iz ovog člana.

VII ŠTEDNJA VODE

Član 69.

Vlasnici ili korisnici stambenih i poslovnih prostora dužni su preduzimati sve potrebne mjere za sprječavanje rasipanja i gubitaka vode na svojim kućnim instalacijama.

JP „ViK“ d.o.o. Zenica je ovlašten, ima pravo, da upozori i izda nalog potrošačima da otklone kvarove i preduzmu druge mjere iza vodomjera kako bi potrošnju vode doveli u granicu do 250 l/dan po članu.

Ako potrošač ni poslije ponovljenog naloga, ne izvrši popravak utvrđenog kvara JP «Vodovod i kanalizacija» d.o.o Zenica, će protiv potrošača podnijeti prijavu nadležnom sudu.

U situacijama nedovoljnog dotoka vode za grad JP «ViK» d.o.o. Zenica je ovlašteno da uskrati dalju isporuku vode domaćinstvima čija potrošnja iznosi preko 250 l/dan po jednom članu sve dok se ne otkloni uzrok prevelike potrošnje.

Član 70.

U slučaju veće nestašice vode zbog suše ili iz bilo kojih drugih razloga JP «Vodovod i kanalizacija» d.o.o. Zenica može uz saglasnost Načelnika općine, donijeti plan ograničenja potrošnje vode, odnosno zabranu potrošnje vode u određene svrhe, (pranje i polijevanje javnih površina i sl.).

U slučaju veoma teške nestašice vode naročito poslije elementarnih nepogoda, Načelnik općine Zenica na prijedlog JP«ViK“d.o.o. Zenica ili Službe civilne zaštite će odlukom propisati ograničavanje potrošnje vode, kontrolu i mjere za izvršenje Odluke.

Član 71.

Ograničenje potrošnje vode iz člana 70. ne odnosi se na vatrogasnu službu u slučaju gašenja požara.

VIII ISKLJUČENJE SA JAVNOG VODOVODA I KANALIZACIJE, ODNOSNO PRESTANAK PRUŽANJA USLUGE

Član 72.

JP «Vodovod i kanalizacija» d.o.o. Zenica ima pravo prestati pružati uslugu vodosnabdijevanja, odnosno isključiti objekte sa javnog vodovoda i kanalizacije u slijedećim slučajevima:

1. Kada je priključenje izvršeno bez saglasnosti i odobrenja JP «ViK» d.o.o. Zenica.
2. Kada je korištenje vode ili kanalizacije počelo bez prethodne prijave i davanja potrebnih podataka za evidentiranje potrošača.
3. Kada potrošač otkáže potrošnju vode.
4. Kad se dosadašnji potrošač odjavi, a novi još ne prijavi.
5. Kad se vrši otklanjanje smetnji kvarova na internoj kućnoj vodovodnoj ili kanalizacionoj instalaciji, ili na javnim vodovodnim ili javnim kanalizacionim uređajima.
6. Kada stanje internih vodovodnih ili kanalizacionih instalacija i uređaja stvara mogućnost zagađenja vode u bilo kojem dijelu javnog gradskog vodovoda.
7. Kad je okno za smještaj vodomjera krivicom ili iz nehata potrošača zagađeno, zatvoreno ili nepristupačano.
8. Kad potrošač postupa protivno naredbi o štednji vode, ako je štednja određena ili ima potrošnju preko 250 l/dan po članu i time ugrožava snabdijevanje drugih potrošača.
9. Kad potrošač ne plati račun za potrošnju vode i korišćenje kanalizacione mreže u roku propisanom ovom odlukom ili odbije da primi račun za utrošenu vodu i korišćenje kanalizacione mreže.
10. Kad potrošač priključi nove interne vodovodne i kanalizacione instalacije ili izvrši rekonstrukciju postojećih ili ako dozvoli da se na njegov priključak priključi objekat drugog vlasnika, a za ove radove i postupke nema pismeno odobrenje JP «Vodovod i kanalizacija» d.o.o. Zenica.

11. Ako potrošač namjerno pokvari vodomjer, prekine plombu na vodomjeru ili okrene vodomjer ili vrši bilo koje druge radnje kako bi prikrio količinu potrošene vode.
12. Ako potrošač bez odobrenja JP «ViK» d.o.o. Zenica izvrši izmještanje kućnog priključka ili vodomjera ili skidanje vodomjera.
13. Ako potrošač svoju kućnu instalaciju priključi na kućne instalacije drugog korisnika bez odobrenja JP «ViK» d.o.o. Zenica.
14. Ako potrošač instalacije posebnih vodovoda spoji sa instalacijama preko kojih se snabdijeva sa vodom iz gradskog vodovoda.
15. Ako službenom licu iz JP „ViK“ d.o.o. Zenica onemogući pristup za očitavanje vodomjera i nakon pismene opomene.
16. Kada je došlo do promjene vlasništva (prodajom, nasljeđem, oduzimanjem) objekta (kuće, stana, poslovnog objekta itd.), a da nije izmiren dug za iskorištenu uslugu vode i kanalizacije za dotični objekat od strane prethodnog vlasnika.
17. U svim drugim slučajevima gdje se bespravno, ilegalno ili nasilno troši voda iz javnog gradskog vodovoda i/ili ispuštaju otpadne vode u javnu gradsku kanalizaciju, a da se za to ne vrši uredno plaćanje ili ne poštuju ostale odredbe ove Odluke.

Po prestanku razloga za uskraćene usluge, JP „ViK“ d.o.o. Zenica je dužan, na pisani zahtjev vlasnika objekta, odnosno potrošača, najkasnije u roku 3 dana od dana podnošenja zahtjeva i plaćanja troškova isključenja i ponovnog uključenja, nastaviti pružanje usluga.

IX NADZOR I KONTROLA

Član 73.

Nadzor nad provođenjem odredaba ove Odluke vršit će resorne općinske Službe i JP „ViK“ d.o.o. Zenica. Inspekcijski nadzor vršit će Služba za inspekcijske poslove općine Zenica.

Član 74.

U slučajevima kršenja odredaba ove Odluke, ovlašteni subjekti iz predhodnog člana poduzeće odgovarajuće mjere i pokrenuti postupke u skladu sa Zakonom i ovom Odlukom.

X KAZNE NE ODREDBE

Član 75.

Novčanom kaznom od **1.000 do 3.000** konvertibilnih maraka kazniće se za prekršaj JP «Vodovod i kanalizacija» d.o.o Zenica.

1. Ako ne kontroliše i ne preduzima potrebne mjere za higijensku ispravnost vode (član 5. tačka 3.).
2. Ako odmah ne preduzme mjere za što brže otklanjanje smetnji koje su uzrokovale prekid snabdijevanja ili o smetanjama ne obavijesti potrošače (član 6.).
3. Ako ne preduzme potrebne mjere za otklanjanje kvarova na priključku i vodomjeru u skladu sa članom 26.
4. Ako na uredno podnesen i potpun zahtjev potrošača ne provjeri ispravnost vodomjera (član 40. stav 3.).

5. Ako ne izvrši dezinfekciju kućnih vodovodnih instalacija, pošto je vlasnik ili korisnik objekta izvršio uplatu na račun JP «Vodovod i kanalizacija» d.o.o Zenica, (član 60. stav 3.).
6. Ako ne izvrši čišćenje septičke jame, po uplati propisane sume vlasnika septičke jame (član 67.).

Za prekršaj iz prethodnog stava kazniće se i odgovorno lice u JP «Vodovod i kanalizacija» d.o.o Zenica novčanom kaznom od **200 do 500** konvertibilnih maraka.

Član 76.

Novčanom kaznom od **1.000 do 3.000** konvertibilnih maraka kazniće se za prekršaj investitor, odnosno vlasnik objekta:

1. Ako objekat ne spoji sa javnim vodovodom, odnosno javnom kanalizacionom mrežom, u skladu sa članom 15.
2. Ako prije puštanja u eksploataciju objekta ne izvrši dezinfekciju kućnih instalacija i dovodne interne vodovodne mreže, u skladu sa članom 60.
3. Ako samovoljno izvrši priključenje objekta na gradsku vodovodnu ili kanalizacionu mrežu (član 23.)

Za prekršaj iz stava 1.ovog člana kazniće se i odgovorna osoba u pravnoj osobi novčanom kaznom u iznosu od 200 do 1.000 KM.

Ako je investitor odnosno vlasnik fizičko lice, za prekršaj iz stava 1. kazniće se novčanom kaznom u iznosu od 300 do 1.500 KM.

Član 77.

Novčanom kaznom **od 300 do 1.500** konvertibilnih maraka kazniće se za prekršaj vlasnik objekta odnosno potrošač:

1. Koji vodovodne instalacije i uređaje koristi kao uzemljenje za električna postrojenja i naprave (član 10.).
2. Koji samovoljno izvrši priključenje na vodovodnu odnosno kanalizacionu mrežu, kao i koji bez odobrenja na svom zemljištu ili objektu izvede nove interne vodovodne ili kanalizacione instalacije ili ih rekonstruiše i bez odobrenja ih priključi (član 23.).
3. Ako u roku od 24 sata po saznanju ne prijavi JP «Vodovod i kanalizacija» d.o.o Zenica kvar ili štetu na vodovodnom ili kanalizacionom priključku ili vodomjeru (član 25. stav 1.).
4. Koji postupi suprotno odredbama člana 30. ove Odluke
5. Koji okno za smještaj vodomjera ne održava uredno, ne omogućuje nesmetan pristup (član 35. i član 36.).
6. Koji o promjenama ne obavijesti u propisanom roku JP «Vodovod i kanalizacija» d.o.o Zenica, (član 47.).
7. Koji o zatvaranju ventila ispred vodomjera ne obavijesti JP «Vodovod i kanalizaciju» d.o.o Zenica u roku od 24 sata (član 61. stav 3.).
8. Ako na vrijeme ne izvrši čišćenje (pražnjenje) septičke jame ili ako dođe do preljevanja, a time i zagađenja okoline iz septičke jame (član 66.).
9. Ako potrošač svoje kućne instalacije priključi na kućne instalacije drugog korisnika bez odobrenja JP «Vodovod i kanalizacija» d.o.o Zenica (član 72. tačka 13.).
10. Koji ne prilagodi svoje okno za vodomjer u propisanom roku (član 36.).
11. Koji bespravno ulazi u okna javnog gradskog vodovoda (član 59).

12. Koji ne brine o ispravnosti kućnih vodovodnih i kanalizacionih instalacija i ne obezbjedi ih od oštećenja i smrzavanja (član 62.).
13. Koji onemogućava slobodan pristup ovlaštenim uposlenicima JP «ViK» d.o.o. Zenica (član 63.)
14. Koji u kanalizacionu mrežu ispušta, odnosno ubacuje zabranjene stvari (član 64.).
15. Koji u kanalizacionu mrežu ispušta vodu i druge tečnosti preko dozvoljene toplote i zapaljive štetne materije (član 65.).
16. Koji ne izvrši naložene opravke vodovodnih instalacija za sprečavanje rasipanja vode (član 69.).
17. Koji se ne pridržava plana ograničenja potrošnje vode (član 70.).
18. Ako potrošač bez odobrenja JP «Vodovod i kanalizacija» d.o.o. Zenica izvrši izmještanje kućnog priključka ili vodomjera ili skidanje vodomjera. (član 21. i član 72. tačka 12. i 13.).
19. Ako nasilno i bez odobrenja JP «ViK» d.o.o. Zenica koristi njihovu uslugu, odnosno ukoliko davaocu usluge spriječi pristup vodomjeru ili mjestu priključka, kako bi JP «ViK» d.o.o. Zenica iskoristio svoje pravo iz člana 73.
20. Ako potrošač instalacije posebnih lokalnih vodovoda spoji sa instalacijama preko kojih se snabdijeva vodom iz gradskog vodovoda (član 12. i 72. tačka 14.).

Ako je potrošač, odnosno investitor pravno lice, za prekršaj iz predhodnog stava kaznit će se novčanom kaznom od 1.000 do 3.000 konvertibilnih maraka, a odgovorno lice u pravnom licu novčanom kaznom od 200 do 1.000 konvertibilnih maraka.

Član 78.

Novčanom kaznom od 1.000 do 3.000 konvertibilnih maraka kaznit će se Služba za imovinsko pravne odnose općine Zenica, a pomoćnik Načelnika navedene Službe i Šef katastarskog ureda novčanom kaznom od 500 do 2.000 konvertibilnih maraka, ako u katastarskom operatu općine Zenica izvrše prijenos posjeda objekta (kuće, stana, poslovnog prostora, garaže, itd) ili zemljišta na kom se nalazi taj objekat, a da pri tom nije obezbjeđena potvrda JP „ViK“ d.o.o. Zenica kojom se potvrđuje da su za dotični objekat izmirene obaveze iskorištenih usluga vode i kanalizacije

XI ZAVRŠNE ODREDBE

Član 79.

Stupanjem na snagu ove Odluke prestaje da važi Odluka o vodovodu i kanalizaciji («Službene novine općine Zenica», broj 9/99).

Član 80.

Ova Odluka stupa na snagu osmog dana od dana objavljivanja u «Službenim novinama općine Zenica».

Broj: _____
Zenica: _____

Predsjedavajući
Vijeća općine Zenica:

Nikolić Nebojša

OBRAZLOŽENJE

PRAVNI OSNOV:

Pravni osnov za ovu Odluku sadržan je u odredbama člana 8. i 14. Zakona o komunalnim djelatnostima („Službene novine ZE-DO kantona“ broj 17/08) i člana 2. Zakona o javnim preduzećima („Službene novine FBiH“ broj:8/05), kojima je utvrđena nadležnost Općine da obezbjeđuje organizirano obavljanje komunalnih djelatnosti, a u skladu sa načelima obavljanja djelatnosti od javnog društvenog interesa.

RAZLOZI ZA DONOŠENJE:

Osnovni razlozi za donošenje nove Odluke o vodovodu i kanalizaciji, su što je trenutno važeća Odluka o vodovodu i kanalizaciji od 29.12.1999. godine prevaziđena, određene promjene koje su se u međuvremenu dogodile izmjenom zakonskih propisa, kao i činjenica da praksa pokazuje da neka događanja i odnose treba definisati jer ili nisu bili uopšte definisani ili nisu bili dovoljno precizno definisani.

POJEDINA PRAVNA RJEŠENJA:

Za članove 2 i 3.

Ovim članovima se jasnije definišu vodovodni uređaji, odnosno javni vodovod i javna kanalizacija kojim upravlja JP «ViK» d.o.o. Zenica i vodovodne i kanalizacione instalacije koje pripadaju kućnim instalacijama koje su vlasništvo potrošača.

Ovim članovima se takođe definiše obaveza da se kišna i fekalna kanalizacija ubuduće moraju raditi kao zasebni sistemi (separatno, odnosno odvojeno). Na ovaj način obezbjeđuje se manje zagađenja zraka, odnosno nema širenja neugodnih mirisa iz fekalne kanalizacije po gradu i ulicama, sigurnija odvodnja i manje izljevanja fekalne kanalizacije u vrijeme kišnih padavina, jeftinije sisteme za prečišćavanje otpadnih voda itd. Primjera radi, Sarajevo je ovu materiju ugradilo u Odluku o vodovodu i kanalizaciji još 1984. godine.

Za član 7.

Ovim članom se uvode pravila i obaveza da se ubuduće kod gradnje novih objekata vodovodne instalacije moraju izvesti tako da omogućavaju mjerenje potrošene vode za svakog vlasnika prostora ponaosob, dakle preko njegovog zasebnog vodomjera.

Za članove 11.,12., 13.,14.

U dosta prigradskih naselja, praksa pokazuje, da potrošači JP «ViK» d.o.o. Zenica priključuju lokalne vodovode, bunare i izvore na istu instalaciju, u kućama i drugim privatnim objektima, koja je priključena na gradski vodovod. Na ovaj način postoji opasnost miješanja vode iz lokalnih izvora koja nije pod kontrolom sa vodom iz gradskog vodovoda, a što može imati za posljedicu zagađenje vode u gradskom vodovodu, a na drugoj strani može doći do prelijevanja vode iz gradskog vodovoda u lokalne vodovode.

Ovim članom pravno se definiše zabrana mješanja instalacija iz lokalnih vodovoda sa instalacijama koje se spajaju na gradski vodovod.

Za član 23.

Da bi se spriječilo samovoljno i protuzakonito priključenje na javni vodovod utvrđuje se obaveza da bespravni korisnici, u trenutku otkrivanja nelegalnog priključka imaju obavezu da plate za utrošenu vodu za period ilegalnog, samovoljnog korištenja.

Za članove 26. i 27.

Ovim se preciznije nego do sada definišu obaveze JP «ViK» d.o.o. Zenica i potrošača kada su u pitanju vodomjeri, njihovo čuvanje i održavanje.

Za članove 29., 30., 31. i 32.

Ovim članom se propisuje pravo, ali i uslovi za ugradnju pojedinačnih vodomjera (vodomjer u svaki stan) koje dosadašnja odluka nije tretirala.

Za članove 40. i 41.

Ovim se članovima vrši dopuna dosadašnjih odredbi kontrole ispravnosti vodomjera u smislu podnošenja troška. Naime, propisuje se da troškove vanredne kontrole ispravnosti vodomjera kod izražavanja sumnji u tačnost mjerenja snosi ona strana u postupku za čije se navode utvrdi netačnost.

Za član 48.

Dosadašnjom odlukom nije bilo propisano koji se dokumenti smatraju validnim dokazom stvarnog stanja broja korisnika vode u pojedinim stanovima gdje se potrošnja obračunava preko broja članova domaćinstva. Naime prilagale su se neovjerene izjave, kućne liste i sl. koje nisu bile istinite.

Na ovaj način prevazilazi se dosadašnja praksa i propisuju dokumenti koje će JP «ViK» d.o.o. Zenica tretirati validnim.

Za član 52.

JP «ViK» d.o.o. Zenica svakog mjeseca vrši očitavanje vodomjera za domaćinstva. Mjesečni računi predstavljaju pomoć potrošačima u smanjenju gubitaka vode na kućnim instalacijama, jer predstavljaju blagovremenu dostavu informacija o potrošnji vode.

Za član 53.

Odredbom ove Odluke da sve normative i cjenovnike utvrđuje i upravlja Nadzorni odbor, a što je i do sada bila praksa u JP «ViK» d.o.o. Zenica, namjera je da kroz odluku o ovoj činjenici bude upoznat što veći broj potrošača. Odnosno ovim se stavlja do znanja i propisuje da uprava i menadžment preduzeća ne može određivati ni jednu stavku u troškovima koji plaćaju potrošači bez osnivača, općine, odnosno bez njenih organa.

Za član 56.

Odredbom ovog člana se propisuje da JP «ViK» d.o.o. Zenica mora dati izjašnjenje na svaku pismenu reklamaciju potrošača. Da bi to JP «ViK» d.o.o. Zenica mogao izvršiti potrebno je utvrditi rok u kojem potrošač može izjaviti prigovor.

Za članove 59., 60. i 63.

Ovim članovima samo se vrši dopuna dosadašnjih propisa iz razloga što je dosadašnja praksa to pokazala potrebnim.

Za članove 75., 76. i 77.

Ovim članovima su novčane kazne usklađene sa novim Zakonom o prekršajima.

Ostali članovi, u obrazloženju ne pomenuti uglavnom su prepisani iz postojeće Odluke ili se suštinski ne mijenjaju.

SREDSTVA ZA DONOŠENJE ODLUKE:

Za donošenje ove Odluke nisu potrebna posebna budžetska sredstva.

Služba za komunalne poslove i ekologiju